

OBIJEŽAVANJE 40. GODINA LIMSKE DEKLARACIJE



U periodu od 5. do 7.12.2017. godine, vrhovna revizorska institucija Perua obilježila je četrdesetu godišnjicu Limske deklaracije Međunarodne organizacije vrhovnih revizorskih institucija (INTOSAI), te organizovala Međunarodnu konferenciju o prevenciji i borbi protiv korupcije. Ispred Ureda za reviziju institucija u FBiH, svečanom obilježavanju prisustvovao je generalni revizor, Dževad Nekić.

Limska deklaracija predstavlja Magna Cartu revizije javnog sektora, tj. osnovni dokument koji je postavio temelje za javnu kontrolu i na kojoj se zasnivaju rad i nezavisnost vrhovnih revizorskih institucija širom svijeta. Principi Deklaracije važe danas kao što su važili prije četrdeset godina, a njen značaj je prepoznat od strane Ujedinjenih Nacija u dvije Rezolucije Generalne skupštine.

Deklaracija navodi svrhu i ovlasti revizije javnog sektora, a srž Deklaracije je u isticanju važnosti nezavisnih revizorskih institucija i njihove zaštićenosti od vanjskog uticaja. Nezavisnost revizorskih institucija prema Limskoj deklaraciji treba da bude utvrđena Ustavom, dok se detalji razrađuju zakonom.

Zakonom o reviziji institucija u FBiH uspostavljen je Ured za reviziju institucija u FBiH, kao vrhovna revizorska institucija u Federaciji BiH. Iako Zakon osigurava osnovne uslove za nezavisnost, ista ipak nije zagarantovana Ustavom Federacije BiH. Navedeno znači da nije osigurana potpuna ustavno-pravna zaštita Ureda za reviziju u skladu sa Limskom deklaracijom.

Uz svečanost obilježavanja godišnjice, razmatran je napredak u stepenu nezavisnosti vrhovnih revizorskih institucija širom svijeta kao i budući izazovi. Razmatrane su i veze između Limske deklaracije i strateških ciljeva INTOSAI-ja.

U narednom periodu Ured za reviziju će, u skladu sa svojim strateškim ciljevima, nastojati jačati svijest o važnosti nezavisne vrhovne revizorske institucije kao i potrebi njezine Ustavne nezavisnosti.